



**Komunikadu Imprensa**  
**Tribunál Distritál Dili**  
**20 Marsu 2019**

## **Tribunál falla halo alterasaun desizaun favorese ba arguidu**

Tribunál Distritál Dili absolve arguidu FFG hosi krime violasaun seksuál ho agravasaun hasoru lezada ne'ebé seidauk kompleta tinan 15. Tribunál konsidera katak arguidu ninia hahalok la prenxe elementu krime violasaun seksuál ho agravasaun ne'ebé prokuradór akuza hasoru arguidu. Julgamentu leitura ba akordaun ne'e hala'o iha 12 Marsu 2019.

JSMP fiar katak Artigu 178 Kódigu Penál (KP) mak nu'udar artigu ida-ne'ebé relevante iha kazu ne'e. Artigu 178 KP define katak mezmu lezada konsiente ba aktu seksuál sira ne'e maibé bainhira nia idade foin tinan 14 to'o 16, lei konsidera seidauk iha experiénsia<sup>1</sup>.

JSMP hanoin katak mesmu arguidu nia aktu ne'e la priénse elementu krime violasaun seksuál ho agravasaun tanba laiha faktus sira hanesan obriga, ameasa no ka halo lezada lakon konsiénsia, maibé relasaun seksuál ne'e akontese kuandu lezada nia idade seidauk atinzi liu tinan 16 singifika katak lezada inexperiénsia ba halo relasaun seksuál.

Bainhira Tribunál altera ba artigu 178 KP, tribunál sei iha opsaun atu promove pena alternativa no kondena arguidu ho pena ne'ebé ekilíbriu ho ninia hahalok atu evita hahalok hanesan iha futuro, la'os absolve totalmente hanesan iha kazu ne'e. Tuir loloos tribunál tenke halo alterasaun bazeia ba artigu 274 KPP<sup>2</sup> tanba lezada rasik idade seidauk atinje tinan 15.

---

<sup>1</sup> Artigu 178 Kódigu Penál kona-ba Aktu seksuál ho adolexente define katak ema maiór ne'ebé, iha situasaun ne'ebé la tama iha seksaun ida-ne'e nia previzaun, pratika aktu seksuál relevante ho labarik tinan 14 to'o 16, tanba abuza nia inexperiénsia sei hetan pena prizaun to'o tinan 5.

<sup>2</sup> Artigu 274 KPP kona-ba alterasaun kona-ba kualifikasaun jurídika, define katak kuandu haré katak faktu ne'ebé tama iha akuzasaun tenke iha kualifikasaun jurídika seluk, maske kualifikasaun foun ne'e hasae pena aplikavel nia limite másimu, tribunál fo-hatene ba Ministériu Públiku ho defensór, no, kuandu sira ruma husu, fó ho prazu ba sira atu prepara sira nia pozisaun prosesuál.

"JSMP husu ba tribunál atu halo avaliasaun ida ho rigor no profundo ba faktus hotu-hotu ne'ebé prodús no revela durante julgamentu no aplika artigu ne'ebé apropiadu nune'e bele asegura desizaun ida ne'ebé justu ba lezada no tribunál kumpri obrigasaun sira tuir lei haruka", dehan Diretór JSMP Luis de Oliveira Sampaio.

Kazu ne'e prokuradór akuza arguidu kontra artigu 172 no 173 (d) Kódigu Penál kona-ba violasaun ho agravasaun ho lezada ne'ebé seidak atinje tinan 17, ho moldura penál hosi tinan 5 to'o tinan 15 prizaun.

Iha produsaun ba prova, arguidu konfesa katak nia halo duni relasaun seksuál ho lezada ho lezada nia konsentimentu dala tolu no ida ikus iha kareta laran rejulta lezada isin rua. Arguidu argumenta katak nia hatene lezada idade menór maibé la hatene katak halo relasaun seksuál ho labarik sira nu'udar krime. Entretantu, lezada rezeita fó deklarasaun relasiona ho faktu sira perante tribunál.

Iha alegasaun finál, prokuradór husu ba tribunál atu hare didiak hodi bele decide tuir deit faktu sira ne'ebé mak prodús iha julgamentu no la indika pena konkreta iha nia alegasaun. Enkuantu defeza husu atu tribunál fó justisa ida-ne'ebé justu ba arguidu tanba arguidu konfesa, arrepende ninia hahalok, relasaun seksuál ne'e akontese tanba konsentimentu hosi lezada no arguidu foin primeiravés hatan iha tribunál.

JSMP konsidera katak prokuradór rasik falla tanba la hato'o pedidu alterasaun ba tribunál, bainhira iha produsaun ba prova mosu katak krime ne'e akontese tanba konsentimentu no laiha obrigasaun iha akontesimentu ne'e. Papel prokuradór nian mak defende vítima sira, nune'e prokuradór tenke tetu no analiza sirkunstánsia hotu-hotu no kumpriende didiak provizasaun relevante sira ho faktu sira ne'ebé prodús durante julgamentu atu garantia protesaun ba vítima sira.

JSMP mós preokupadu tanba Tribunál falla atu identifika provizaun ida-ne'ebé relevante ba kazu ne'e depoisde hetan faktu foin durante produsaun ba prova. Tribunál konklui katak la iha prova arguidu prátika violasaun seksuál hasoru lezada tanba (la obriga ka ameasa) no relasaun ne'e akontese ho konsentimentu hosi lezada. Aleinde ne'e, tribunál konsidera katak julgamentu ba kazu refere la fundamentu (Inprosedente). Bazeia ba konsiderasaun hirak ne'e, tribunál absolve arguidu husi akuzasaun prokuradór nian.

JSMP preokupa teb-tebes tanba desizaun tribunál nian hodi absolve arguidu ne'ebé halo relasaun seksuál ho labarik ne'ebé seidak atinje tinan 15 no rezulta lezada isin rua. Desizaun ne'e la eduka arguidu no la eduka comunidade iha jerál.

Kazu ne'e rejista iha tribunál ho Nú. Prosesu: 0002/17. PDDIL. Kazu ne'e prezide hosi juis koletivu, Dr. Antonio Helder, Dra. Maria Solana, Dr. Ivan José Suritay Patrocinio Antonio Gonsalves. Prokuradór representa hosi Dra. Ivonia Maria Guterres no arguidu hetan defeza hosi Dr. Marçal Mascarenhas hosi Defensoria Pública.

Atu hetan informasaun kle'an liu tan favor kontaktu:

Luis de Oliveira Sampaio

Diretór Ezekutivu JSMP

Telefone: 3323883

[www.jsmp.tl](http://www.jsmp.tl)